


# CELEBRACIÓN DO DOMINGO EN OS COTOS

23-24 de xuño do 2018

## XII DO TEMPO ORDINARIO



OS COTOS COA IGUALDADE VERDADEIRA DAS PERSOAS,  
CO POBO DE SIRIA QUE SOFRE UNHA GUERRA INJUSTA,  
COS REFUXIADOS E MARXINADOS DA SOCIEDADE  
E COA NATUREZA MALTRATADA POLOS INCENDIOS



## 1.- ENCONTRO DA COMUNIDADE

(tod@s de pé)

@ monitor/a está na sé

CANTO n° 4 🎵 *Amigos nas penas*

### SAÚDO DE BENVIDA

#### *Celebrante*

Benvidos sexamos todos a este encontro. Reunímonos coma comunidade no nome do Pai, e do Fillo e do Espírito Santo.

Na vida, son moitas as veces que nos teñen dito “non teñas medo”, e cantas veces non teremos dito nós o mesmo. Pero unha cousa é dicilo, e outra superalo.

O medo fai difícil tomar decisións, fainos renunciar a dar razóns das nosas esperanzas e conviccións.

Por medo péchanse as portas aos refuxiados, por medo moitas mulleres sofren violencia de xénero, por medo cálanse inxustizas, por medo mírase para outro lado, por medo non aceptamos a quen pensa, vive ou cre diferente.

E cando temos medo sabemos da necesidade de alguén a nosa beira para facerlle fronte. Nestas andan os discípulos, e non dubidan en acudir a Xesús. Con el o medo convértese en superación, en ocasión para deixar atrás os atrancos.

## ACTO PENITENCIAL

**Celebrante** Con Xesús da nosa parte, atrevémonos a pedir perdón, confiámonos á misericordia do Deus que perdoa. Achegámonos a El porque non nos dá medo achegarnos ao Pai. Pómonos nas súas mans para deixarnos perdoar

### **Monitor/a**

- Porque o medo nos bota para atrás, e nos enche de desconfianzas á hora de crer. Señor téndenos a túa man
- Porque o medo nos alonxa dos demais, e nos fai desconfiados á hora de compartir. Cristo téndenos a túa man
- Porque o medo nos enche de covardías, nos bota para atrás, conformándonos e deixándonos levar. Señor téndenos a túa man

## ORACIÓN PROPIA DO DIA

**Celebrante** Rematamos a primeira parte da celebración presentando no silencio o que rebule no noso interior. Hoxe rezamos polos veciños de Paramos que con medo miran os baleiros das súas casas, rezamos polos pobos de Guatemala que con medo se senten esquecidos na miseria, rezamos polos pobos de Siria e Palestina que con medo vense moi lonxe de compartir en paz, e rezamos con todas as mulleres que con medo se ven lonxe da xustiza.

*(silenzo)*

Deus, noso Pai,  
ti non abandonas nunca aos que fundaches  
sobre a pedra firme da túa caridade.  
Concédenos vivir sempre facendo realidade  
o amor que téis con nós,  
e dános o auxilio da túa graza  
pois contigo a nada tememos.  
Pedímoscho a Ti, que vives e reinas  
por sempre eternamente. Amén

## 2.- PROCLAMACIÓN DA PALABRA DE DEUS

**(sentad@s)** a palabra de Deus proclámase dende o ambón

**Celebrante** *Escoitar con medo non é escoitar. A Palabra de Deus é vida cando a acollemos, cando deixamos que sexa en nós semente, cando con ela medramos vencendo os nosos propios medos. Coma discípulos deixemos que a Palabra de Deus nos alente.*

*No Leccionario II – B páxina 205* **LECTURA**

**LECTURA DO LIBRO DO PROFETA EZEQUIEL**

**nº 41** **♪ Quen nos vai separar de Ti?** **SALMO**

**(en pé)** *No Leccionario II – B páxina 206* **EVANXEO**

**PROCLAMACIÓN DO EVANXEO DE MARCOS**

**(sentad@s)** gardamos uns instantes de silencio para acoller a palabra no corazón

## PROFESIÓN DA FE

*Celebrante* Neste encontro parroquial no que renovamos os nosos compromisos con Xesús, queremos contar con El á nosa beira para superar os medos e facer vivo o evanxeo no que cremos.

*Dicimos*

♪ *Creo, Señor, pero aumenta a miña fe*

*Monitor/a*

Credes en Deus Pai,  
creador do ceo e máis da terra,  
e que nos quere á súa imaxe e semellanza  
dando unha man a quen a precise?

*Creo, Señor, pero aumenta a miña fe*

Credes en Xesús,  
o seu fillo benquerido,  
que viviu nesta terra dando unha man  
para amosarnos que así damos vida ao evanxeo?

*Creo, Señor, pero aumenta a miña fe*

Credes no Espírito Santo,  
na Igrexa, na comunión dos santos,  
no perdón e na vida eterna máis alá da morte  
con todos os preferidos de Deus?

*Creo, Señor, pero aumenta a miña fe*

## (en pé) ORACIÓN UNIVERSAL

*Celebrante* Oremos a Deus Pai, e como comunidade poñamos nas súas mans os nosos mellores desexos para esta sociedade na que vivimos.

*Oremos dicindo Pai, axúdanos a superar os medos*

*Monitor/a*

1. Pai bo, pedimos hoxe pola nosa sociedade, para que entre todos a vaiamos construíndo sen medo a mellorar, máis xusta e pacífica cada día. Oremos

2. Pai, pedimos tamén polas persoas que facemos a igrexa, para que vivamos a fe con conciencia e non nos contentemos con rutinas. Oremos

3. Pai, pedimos por todos os crentes, para que teñamos unha personalidade optimista, e saibamos dar unha man a quen ten medo a vivir. Oremos

4. Pai cheo de tenrura, axúdanos ser acolledores e preocupados con todas as persoas que máis medo teñen, como fixo Xesús. Oremos

5. Pai, pedimos por todas as persoas que teñen a responsabilidade de gobernar, para que vexan polos que se ven afogar no fondo do mar. Oremos

*Celebrante* Deus Pai, escoita as nosas pregarías, e énchenos do alento que levaba a Xesús a dar unha man como escoitamos no evanxeo de hoxe. Ti que vives e reinas por sempre eternamente. Amén.

### 3.- OS SIGNOS DA COMUÑÓN CON DEUS E COA COMUNIDADE

#### NOSO PAI

**Celebrante** Fiándonos dos consellos de Xesús, querendo ser testemuñas da súa vida imos rezar sen medo a non ser escoitados. Con El á nosa beira somos cristiáns confiados para orar como nos aprendeu

NOSO PAI ...

#### SIGNO DA PAZ

**Celebrante** As nosas mans tendidas uns para os outros expresan a nosa vontade de ser coherentes con Xesús no que dicimos e no que facemos. A paz non se fai con medo, faise con respecto, con tolerancia, faise con todas as mans atrevidas para que outros non teñan medo. A paz é atreverse a dar unha man e deixarse dar unha man.

**CANTO** 🎵 n° 36 *Fagamos a paz irmáns*

#### COMUÑÓN

**Celebrante:** A mesa da Fe é anticipo da mesa do Reino; participar nela é comprometer a vida en construír un mundo no que vale a pena axudarnos. Ditosos todos nós, que nos sentimos convidados a esta mesa do Señor.

**CANTO**      n°43      🎵    *Non vou so*  
                  ou    n°58      🎵    *Acharte presente*

### 4.- AVISOS E DESPEDIDA

#### ORACIÓN FINAL

**Celebrante** Oramos a ti, Señor, que por este pan da vida que acabamos de compartir realizas a unidade desta comunidade e d'Os Cotos.

Fai que a túa luz nos guíe polo camiño do ben, asumindo responsablemente as nosas decisións e aceptando as dos demais.

Pedímolo por Cristo noso Señor. Amén.

*Con Xesús, cremos que vale a pena facer evanxeo sen medo a dar unha man a quen a necesite.*

*Con Xesús queremos facernos cribles e sen medo a ser semente dun mundo máis acolledor.*

*Con Xesús queremos lembrarnos dos veciños da parroquia de Paramos, queremos lembrar o que está sucedendo en moitos pobos de Guatemala co volcán, queremos lembrar as terras de Palestina e Siria e a súa paz ausente, e queremos lembrar a todas as mulleres que se ven lonxe da xustiza.*

Que o Señor nos bendiga, † nos garde de todo mal  
e nos leve á vida eterna. Amén

*Avísase das misas (ver folla do mes) e recordamos que o vindeiro domingo Sebas (seminarista de Fornelos) vai dar un paso importante no camiño cara o sacerdocio. Vai ser ordenado diácono. Na nosa oración destes días pidámoslle a Deus que o axude. Será na catedral de Tui ás 7, estamos convidados.*